


CBETA電子佛典集成

CBETA Chinese Electronic Tripitaka Collection
eBook

T20n1159B

佛說地藏菩薩陀羅 尼經

財團
法人 佛教電子佛典基金會



目次

- [編輯說明](#)
- [章節目次](#)
- [卷目次](#)
 - .001,
- [贊助資訊](#)

編輯說明

- 本電子書以「CBETA 電子佛典集成 Version 2023.Q4」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

No. 1159B

佛說地藏菩薩陀羅尼經

如是我聞：

一時佛在佉羅提耶山牟尼仙所住之處，與大比丘眾俱，無量無數聲聞大眾，菩薩摩訶薩無量無邊不可稱計，說月藏訖。爾時南方有大香雲雨大香雨、大華雲雨大華雨、無量瓔珞雲雨種種瓔珞雨、大衣雲雨大衣雨。於佉羅提耶山牟尼仙所住之處，是諸大雨皆悉遍滿。大陰雲雨而香華衣服瓔珞，亦說種種無量法音。如是次第乃至廣說：三歸聲、持戒聲、忍辱聲、精進聲、禪定聲、具足智慧降伏四魔聲、名稱普聞遍滿三界聲、念定總持聲、空無相無願聲、離欲聲、色如聚沫聲、受如水泡聲、想如熱炎聲、行如芭蕉聲、識如幻聲、無常苦空無我之聲、慚愧聲、念處聲、慈悲喜捨聲、證諸法聲、涅槃無窟宅聲、三乘聲、轉法輪聲、成就眾生聲、度三惡道聲、六波羅蜜聲、善巧方便乃至具足十地聲、遊戲神通聲、遊戲無上大乘聲、阿鞞跋致聲、無生法忍聲、入佛海聲。諸來眾悉見種種雨，亦聞無量諸法音聲、隨意衣服嚴飾之聲，又復皆悉見其兩手有如意珠雨如意寶，其如意寶各出光明，如是光中皆見十方恒沙世界一切諸佛，是諸佛所各有菩薩而自圍遶，其光明中盡見十方諸佛世界。若有病者，蒙光觸身，眾病除愈。一切繫縛及應死者，光觸身故，皆得解脫。若身行惡、口行惡、意行惡，光觸身時，悉除三惡。若諸飢渴眾生，蒙光觸身，亦皆飽滿。種種擿罰身受苦切，乏少衣服嚴飾瓔珞種種之物，蒙光觸身，隨所憶念悉得滿足。若有殺生、偷盜、邪淫、妄言、綺語、兩舌、惡口、罵詈，蒙光觸身，如是等惡皆悉得除。諸眾生有求不得苦，蒙光觸身，皆悉受樂，光明清淨悉無翳障，風雲塵霧及諸穢苦惱辛酸，不善音聲，乃至怖畏惡觸皆得除滅。遠離諸惡，一切邪偽諂曲亦皆無餘，一切惡欲悉得棄捨，諸妙勝樂一切皆集。爾時眾會皆悉堅固難動，不動如地，心無去來不可毀壞。如是大眾得未曾有：「以何因緣，我等身體今皆大

重不能自勝？」當於爾時有一帝釋名曰淨有，於大眾中不遠而坐。於是淨有即從座起，而整衣服右膝著地，合掌向佛以偈問曰：

「實語實見者，實住牟尼尊，
久住於法行，唯願演說法。
佛為實因緣，能滅眾生苦，
何故於此處，而兩種種雨？
大眾皆喜悅，心生信安樂，
開示諸疑惑，令住於大乘。
身難動如地，及一切人天，
皆見如是相，大眾悉有疑。
兩手各皆出，摩尼寶光明，
一切諸衣鬘，雜飾嚴身具。
十方之福田，離一切過惡，
眾苦得休息，皆因緣救世。
一切諸天人，無能說因緣，
是誰神通力，而來至此處？
為佛諸菩薩？梵摩帝釋等？
唯願救世說，神通之因緣。」

爾時世尊告淨有帝釋言：「如是如是。汝今諦聽，吾當說之。是地藏菩薩摩訶薩，於無量阿僧祇劫為五濁惡世成就眾生故而來至此，與八十頻婆那由他百千億等大菩薩俱，悉為禮拜供養恭敬故、欲見大眾集會故、欲聽大眾起隨喜故。是地藏菩薩作沙門像，現神通力之所變化，有如是等大莊嚴事。亦是如來不可思議無量功德，亦名聲聞辟支佛正法伏藏，亦名解脫智寶之大寶渚，亦名菩薩救世之法，亦名涅槃導師商主。猶若如意寶珠所求滿足，亦如寶渚一切商人，亦如大地能生善根，亦是涅槃求法神器，亦是功德清淨之瓶，亦是日月照明行處，亦是黑闇幽冥大炬。如月清涼煩惱熱，如無足者得如意乘，如亂心者得甘露味，如羸老者遇其机杖。是大福田之根本也。捨心無疑，如彼後流救苦難，如起親友除結使炎之雲蓋，如淨水珠除穢濁，若起嶮迴示正路。是疲極者安隱林坐，是四駛流

生死橋梁亦度彼岸無上大船，是三善根勝妙果報，是諸施者最上大乘。持戒不動如須彌山，精進難壞猶如金剛，忍辱堅固亦如大地，總持正法心無三相，禪定莊嚴如妙華鬘，智慧深廣猶如大海，心無所依猶如虛空，方便無染如眾華聚。處於外道如師子王，遠離煩惱如犀一角，滅諸結使如洗塵垢，能除臭穢如疾飄風，將護有疾如彼良醫，消除眾病如妙藥王，斷除煩惱如持利劍。為怖畏者作大親友，防諸怨敵如堅城塹。能除其濁如清淨水，濟諸飢乏猶如茸果。亦是裸者最勝衣服，與盛熱者為密雲蓋。具足如是善根果報，清淨第一堅固不壞，妙色處能生受樂，於大會處而生慚愧，除諸結使，禪定行處，乘四正勤，四攝決流。忍辱大地亦如須彌、總持深廣如彼大海、神足無礙自在如虛空。降伏諸魔一切結習、修行正道無量禪定、亦為一切種種智之洲渚、能轉無上清淨法輪。地藏菩薩摩訶薩為欲來故、先現此瑞。亦為供養恭敬我故、來至於此。」佛復讚嘆地藏菩薩言：「汝從南方來。」八十頻婆百千那由他菩薩以神通力俱來至此，悉作聲聞像，在如來前頂禮佛足，右遶三匝，即為合掌而說偈言：

「兩足最勝大導師， 恒修於慈發善心，
能生忍辱如大地， 解脫眾生除瞋恚。
具足最大諸相好， 而能嚴飾一切界，
能滿一切諸福田， 常修實語及大慈，
能悉斷除諸受網， 皆能如實善安住。
捨餘清淨諸佛國， 其中眾生具善根，
本願欲度濁惡世， 成就一切諸眾生。
能生堅固勤精進， 超過無量諸苦行，
常修難行恐怖處， 超過無量諸苦行。
布施持戒忍精進， 修習禪定與智慧，
無數諸佛菩薩等， 聲聞大眾皆供養，
充給飢渴病湯藥， 救度一切諸繫縛。
我從本來捨身命， 為利眾生無貪惜，
常為法故而捨身， 皮骨肉血施眾生，
已所得樂皆悉捨， 有大慈悲為一切。」

於諸眾生煩惱網，修行寂滅悉超度，
開閉一切六情根，常能遠離於諸欲，
修苦無常空無我，亦善觀察於世諦。
諸苦所因愛欲本，悉能乾竭諸煩惱，
以是義故攝六情，能善斷除一切愛，
能修無量大悲門，普給一切諸群生。
我要不捨大誓願，而亦不住勝菩提，
一切眾生如如相，亦見群盲受苦切，
如是思惟為眾生，便能勲修大精進。
發超精進施戒忍，修諸禪定及智惠，
猶如其母唯一子，而以慈心育養之。
汝於眾生亦如是，常能賑給於一切，
是故汝速得菩提，度脫一切無量眾。
汝本修習菩提時，誓願不捨一眾生，
無不便住施戒忍，精進禪定修智惠。
常能於彼末世中，求於無上勝菩提，
是故救世於末劫，速得無上最勝道。
調伏惡魔夜叉等，諸惡龍神及與人，
猶如金剛斷諸結，悉能安住諸聖道。
為無量眾而授記，當成菩提無上道，
功德最勝明智者，是真福田之大將。
於無量界為救世，皆覆一切諸群生，
於十方界作福田，名聲遠聞遍一切。
是故一切諸菩薩，皆悉能捨於己事，
是汝神足而來集，俱詣世尊大牟尼。
願令如來特演說，若得聞者皆歡喜，
既聞法已勲精進，常得修學菩提道，
皆猶於海大將力，當得疾近於菩提，
未曾聞見令大集，是故汝等俱來會。
有十三億諸夜叉，其為殘害食肉血，
疾捨諸惡到於此，安住最勝無上道。
有得忍辱陀羅尼，有得最妙諸禪定；
有已獲證諸漏盡，無著羅漢人中尊；
有能善修四無量；有能住於四攝法；
有得最勝四辯才；復有得修諸忍法；
有得三昧首楞嚴；有得虛空智惠眼；
有得無生諸法忍，皆因世尊所說法。
悉制一切諸異學，九十六種外道等，

摧伏一切魔怨已，皆是救世大將力。
開閉地獄鬼畜生，利益一切天人眾，
是故真實諸眾生，而皆來集佛神力。
飢飢疾疫刀兵劫，悉於今日而消滅，
若自盲冥失正道，此諸眾生令解脫。
無量煩惱狂亂者，皆悉安置寂滅道，
令眾悉能捨己業，為禮如來故至此。
無量世界億佛土，皆是救世之所住，
名聞十方稱無量，我等聞已故至此。
一切種智功德海，得聞如是真實相，
度脫一切諸眾生，我今歡喜故敬禮，
而於百千億萬劫，常懃修習種種施。
我今當學發弘誓，我今來此佛神足，
我當修學處濁世，能到第一勝菩提。」

爾時地藏菩薩摩訶薩以若干種天華香華瓔珞而散佛上，所散之華變成寶蓋。是時地藏菩薩在佛前坐，諦聽受經。諸來會眾見地藏菩薩生希有想，以種種香華瓔珞、繒蓋幢幡及諸衣服以散地藏菩薩上，作如是言：「我等快得善利。佛神力故，得見如是諸大丈夫，禮敬問訊。」

爾時復有渴仰菩薩摩訶薩，從座而起，整其衣服右膝著地，合掌向佛白佛言：「世尊！此善男子從何佛國而來至此？修何善根能作如是種種讚嘆說佛功德？我從昔來未曾聞見。」

爾時世尊告渴仰菩薩：「止止！大士！不須是聞。一切大眾及諸天人，除佛如來無有能知此善男子功德數量，如來今日必當顯說。但諸天人愚闇自弊，是族姓子成就不可思議功德首楞嚴三昧，入如來行處得無生法忍，於諸佛法而得自在，入深法忍已度一切智海。此善男子遊戲，以師子光三昧登一切智山須彌之頂，摧伏異學成就眾生，在所佛國悉皆止住，隨諸佛國入智三昧，以是三昧力故，令一切國土眾生見諸菩薩。隨諸佛國入智樂三昧，於彼國土所有供養

佛。隨諸佛國入清淨樂三昧，入是三昧悉見諸欲一切過悉，而於心相清淨無染。隨諸佛土入慚愧三昧，而於彼國令諸眾生悉得慚愧，遠離諸惡無有愚闇。隨諸佛國入水濯三昧，亦能令彼一切眾生悉入是定，令諸眾生得宿命智，能先世死此生彼，善於禪定。隨諸國土入無憂明三昧，亦能令彼一切眾生悉離憂愁。於諸佛國入神通三昧，亦能令彼一切眾生皆入神通三昧。隨佛國土入智明三昧，亦能令彼一切眾生悉離愚癡，便見十方一切佛國。隨諸佛國入佛炬三昧，亦能令彼一切眾生皆歸依三寶。隨諸佛國入金剛光三昧，入是三昧已，亦能令彼一切諸佛國土，鐵圍山、鐵國圍乃至須彌山王、一切嶼澗溝壑皆悉盡現，地平如掌，能令一切諸惡毒蛇及以蠱道皆悉消滅。隨諸佛國入智力降伏三昧，亦能令彼魔及魔眷屬皆悉驚怖，歸依三寶。隨諸佛國入電光三昧，亦能令彼一切眾生離後世怖，得法安慰。隨諸佛國入味樂三昧，亦能令彼一切眾生隨其所念飲食悉得充足。隨諸佛國入精氣悅樂三昧，亦能令彼一切眾生得堅牢身，離諸病苦。隨諸佛國入樂具三昧，亦能令彼一切眾生悉得狀敷臥具衣服瓔珞，無所乏少病醫藥，身皆端正。隨諸佛國入無諍智三昧，亦能令彼一切眾生身皆長莊端嚴殊大，遠離一切怨憎繫縛，皆悉受樂，皆如布施持戒忍辱精進禪定，心無散亂，具足智惠深入法相。隨諸佛國入無憂怖三昧，而能於彼一切眾生皆得歡樂，心離憂怖。隨諸佛國入光樂三昧，於彼佛國一切眾生得無礙智，離於事務。隨諸佛國入善住金剛三昧，亦能令彼一切眾生得諸根具足悉不缺壞。隨諸佛國入觀幢三昧，亦能令彼一切眾生皆悉厭離棄捨諸惡，護持十善，上生天道。隨諸佛國深入大慈音聲三昧，亦能令彼一切眾生各相哀愍皆起慈心，得無畏心、得無惱心、等心，更相悲念。隨諸佛國入集福處三昧，亦能令彼一切眾生得離鬪諍，疾病飢饉、非時風雨、飲食苦惱辛酸等味皆悉消滅。是地藏菩薩所至佛土，入海電三昧，隨所至國一切皆悉變成寶地，離諸穢惡，衣樹、瓔珞樹、華菓樹嚴飾佛界。於晨朝時入恒河沙世界三昧，為成就眾生故從禪定起，令無量無邊諸佛世界於五濁惡世成就眾生悉無餘。

有佛世界刀兵起時，此族姓子以晨朝時入三昧力故，刀兵鉀杖悉皆消滅。隨諸佛土有疾疫劫起害諸眾生，亦令疾疫自然消滅。隨諸佛土若有飢饉起，令彼飢饉亦盡消滅，悉得充滿。此族姓子以是三昧威神力故，能令成就一切眾生。地藏菩薩以不思議功德成就眾生，於過去無量恒河沙諸佛所發大悲堅固誓願，皆悉成就一切眾生。莊嚴勢力猶如電震，於一食頃而能成就無量億等那由他人具足善根。若有眾生為無量種種諸苦所惱飢渴切逼，有稱地藏菩薩名者，悉能令彼飲食充足滅諸苦惱，置涅槃道皆得快樂。若有眾生乏少衣服寶冠瓔珞、病瘦醫藥種種眾具，若稱地藏菩薩名者，隨其所欲皆令充具足，安住涅槃道得第一樂。若有眾生離喜樂心而與不喜樂集會者，若稱地藏菩薩名者，一切樂具盡皆歸之，所不喜者亦悉遠離，是意所樂者，能令皆得安住涅槃得第一樂。若有眾生身心受苦眾病所持，能稱地藏菩薩名號，身心苦惱皆悉除愈，安置涅槃得第一樂。若諸眾生惡心相向，能稱地藏菩薩名號一心歸依者，令彼眾生柔和忍辱，更相慚愧慈心懺悔，安住涅槃。若諸眾生繫閉牢獄枷鎖其身具受眾苦，能稱地藏菩薩名號一心歸依者，令諸眾生皆得解脫自在無礙，乃至應被繫縛因執鞭杖，能稱地藏菩薩名號一心歸依者，亦復如是皆得解脫，安住涅槃得第一樂。若有眾生諸根不具，疲極懈怠顛狂放逸忘失本心，貪欲瞋恚愚癡、嫉妬慳怖、邪疑憍慢、眠睡等惡皆悉熾盛，能稱地藏菩薩名號一心歸依者，如是眾苦皆令解脫，安住涅槃得第一樂。若有眾生為大水濁流猛火所焚，或墜高巖投身山嶮，或墮樹木及諸屋舍而身顛覆，有如是等無量怖畏，稱地藏菩薩名號一心歸依者，有如是等怖畏之事悉令解脫，安住涅槃得第一樂。若有眾生為諸毒蛇種種禽獸之所螫者，或被種種毒藥所中，能稱地藏菩薩名號一心歸依者，是諸怖畏悉得解脫。若有眾生為阿波魔羅奄弊傷害，若一日二日三日乃至七日，能令心狂心亂、心戰心調、心顛倒乃至失心，能稱地藏菩薩名號一心歸依者，如是族姓男女於諸怖畏悉皆得解脫，安住涅槃得第一樂。若有眾生為諸羅刹惡鬼所捉、鳩槃荼所捉、富單那所捉、迦吒富單所

捉，師子虎狼惡毒蠱道，或為軍陣戰鬥怨賊圍遶，臨敵懼無貪生求樂，能稱地藏菩薩名號一心歸依者，如是族姓子男女速離眾苦悉除患難，安住涅槃得第一樂。若有眾生為多聞、為信、為戒、為施、為禪定、為神通、為解脫、為色聲香味觸、為諸功德、為工巧華菓樹木敷具、為增益財利、為諸醫藥房舍屋宅、為使水雨順時、為得涼風、為求男女妻子方便修福、為除寒熱，令得正念求如是等種種因緣，能稱地藏菩薩名號一心歸依者，此善男子威德力故，悉能稱彼無量眾生功德所願。譬如下種於彼荒田，能稱地藏菩薩名號一心歸依者，皆悉變成微妙勝菓。何以故？此善男子以過去無量阿僧祇不可數劫如來之前，發堅誓願猶如大地，令一切眾生皆悉受用。是善男子功德力故，能令善根莖枝葉乃至華菓皆悉潤澤增長成就。若有眾生造作諸惡十不善業，能稱地藏菩薩名號一心歸依者，一切結使煩惱消滅，遠離十惡成就十善，於諸眾生起慈悲心與利益心。是善男子！以精進力，於一食頃，無量阿僧祇諸佛世界，於一一佛國以一食頃度脫無量恒河沙阿僧祇眾生，以是相貌令脫諸惡，皆悉成就不思議功德。此善男子以是堅固誓力，能令成就一切眾生。如是族姓子或作梵天身成就眾生，或作自在天、大自在天、摩醯首羅天，或作欲界他化自在天、化樂天、兜率陀天、炎摩天、帝釋身、四天王天身，或作菩薩身，或作辟支佛身、作聲聞身，或作轉輪聖王、婆羅門、剎利、毘舍、首陀等身，或作男身女身，或作童男童女身，或作乾闥婆、緊那羅、摩睺羅伽、天龍、夜叉身，或作羅剎身、或作鳩槃荼身、或作毘舍闍身、或作富單那身，或作師子身、或作虎狼身、或作鳩身馬身、或作水牛身、或作種種鳥身，或作閻羅王身、或作地獄卒身、或作地獄身，為諸眾生種種說法，隨眾生顯示三乘，皆悉令作不退轉地。此善男子成就如是不思議功德伏藏，以解脫寶而自莊嚴，亦是菩薩諸法之母，向大涅槃無上商主。善男子！彌勒、文殊、觀世音、普賢等而為上首，如是等恒河沙諸大菩薩，若人於百劫中禮敬供養欲求所願，不如於一食頃禮拜供養地藏菩薩，功德甚多，所願速得悉皆滿足。何以故？此地藏菩薩於

一切眾生能大饒益為如意寶故。此族姓子若欲成就眾生故，能發堅固大悲伏藏，令滿一切眾生心願。是故善男子善女人應當供養地藏菩薩。」時會大眾，十方來者菩薩摩訶薩，及諸聲聞，一切天人、夜叉、乾闥婆等，從座而起隨力供養，或以金銀等以敬彼地藏菩薩上，或以種種寶華衣服、摩尼寶珠及華鬘珠瓔珞、金縷幡蓋以散地藏菩薩上、復以無量音樂種種讚頌供養地藏菩薩。爾時地藏菩薩摩訶薩復以此供施修伽陀，即說偈言：

「天人龍神所供養， 十方菩薩皆來集，
聞有救世大功德， 願佛受我最勝供。」

爾時地藏菩薩摩訶薩說是偈已，頂禮佛足。於是世尊復說偈言：

「欲起堅固淨智者， 能滅眾生諸煩惱，
令眾得樂如寶手， 能斷結納如金剛。
汝起大悲諸精進， 以是供養最勝尊，
其心如海救一切， 度諸眾生苦彼岸。」

爾時地藏菩薩摩訶薩作禮而起，白佛言：「世尊！我當濟度此四天下，增長比丘、比丘尼、優婆塞、優波夷，增長壽命、護念增長壽命，身無病疾，增長色力、增長名稱、增長資業、增長親友、增長眷屬、增長信戒、增長多聞、增長於施、增長忍辱、增長方便、增長學意及諸聖諦、增長人於大乘一切延道、增長照明真實法相、增長成就一切眾生、增長發大慈悲喜捨、增長無量一切淨法、增長妙稱名聞三界、增長法雨潤三有流、增長大地一切物味、增長眾生所有善業、增長法氣無數福行、增長智惠皆悉照明、增長六波羅蜜所行之道、增長五眼通達無礙、增長灌頂、增長涅槃、增長威德照明一切未曾有法眾德究竟記莛呪術陀羅尼章句。我於過去恒河沙佛所，皆悉受持如是等呪，增長白淨具足之法、增長種子根莖華菓一

切藥穀、增長雲雨地水火風、增長福樂、增長財物、增長無量最勝果報、增長基業。此呪利益，能除一切苦惱繫縛。即說呪曰：

「閻浮(一) 閻閻浮(二) 阿舍閻浮(三) 婆迦囉閻浮(四) 菴婆閻浮(五) 毘羅閻浮(六) 婆闍羅閻浮(七) 阿盧伽閻浮(八) 達摩閻浮(九) 婆吒摩閻浮(十) 婆帝耶尼梨阿羅閻浮(十一) 鞞婆婆盧伽反摩閻浮(十二) 憂婆舍摩閻浮(十三) 憂波舍摩閻浮(十四) 那那那閻浮(十五) 闍那婆牟致囉那閻浮(十六) 毘尸梨夜那閻浮(十七) 奢多婆閻浮(十八) 婆遮修躡摩醯利(十九) 陀彌(二十) 縣彌(二十一) 遮迦囉斯(二十二) 遮迦摩私梨(二十三) 差利(二十四) 奚疑(二十五) 迦囉婆婆婆啼(二十六) 阿梨波囉鞞(二十七) 婆遮囉婆陀彌(二十八) 囉遮陀彌(二十九) 波囉遮遮遮醯梨(三十) 摩梨(三十一) 伊迦他他企(三十二) 他丘樓(三十三) 闍梨(三十四) 舍梨(三十五) 彌梨(三十六) 摩板(三十七) 多板(三十八) 鳩梨(三十九) 彌梨(四十) 鴛久之多毘(四十一) 頰梨(四十二) 柢梨(四十三) 波囉柢梨(四十四) 叉吒苦婆梨(四十五) 真祇真(四十六) 真求梨(四十七) 休樓休樓休樓(四十八) 鳩流兜彌梨(四十九) 彌梨板(五十) 婆荼婆可羅(五十一) [門@視][門@視]梨(五十二) 噓[口*留]噓樓[口*留](五十三) 婆婆闍毘(五十四) 輪檀彌(五十五) 私婆呵(五十六) 摩訶復陀迦樓沙毘輪檀彌彌私婆呵(五十七) 迦樓沙羅波毘輪檀彌私婆呵(五十八) 迦樓沙烏闍毘揄檀彌私婆呵(五十九) 薩婆呵奢婆利富羅檀彌私婆呵(六十) 薩婆婆斯耶三波陀彌彌私波呵(六十一) 薩婆多他多阿婁底私婆呵(六十二) 薩婆菩提薩埵阿婁底阿窶元地底私婆呵(六十三)」

「世尊！今所說呪是未曾有威德照明，是眾德本記莢章句陀羅尼神呪。我於過去恒河沙諸佛所受持是呪，增長一切白淨之法、增長諸善根莖枝葉華菓藥穀雨澤地水火風、增長喜樂、增長財物、增長勝

妙、增長產業。此呪威力善能繫縛，亦名善解。世尊！說此陀羅尼呪，與四天下聲聞弟子、比丘比丘尼、優婆塞優婆夷皆悉護念，增長財物一切產業、增長佛法能令流布，廣大無量三界受樂。」

爾時地藏菩薩廣說如是大記菑經。時佉羅提耶山六種震動，一切音聲樂不鼓自鳴、雨眾寶華，一切大眾皆悉戰慄生希有想。

爾時阿難從座而起，偏袒右肩叉手合掌而白佛言：「世尊！此法之惡當名何經？云何受持？云何修行？」佛告阿難：「此經名為地藏菩薩誓願度諸眾生，如是受持。復名大方廣，如是受持。亦名師子光三昧，亦名隨諸佛土入慚愧三昧，如是受持。亦名陀羅尼神呪，如是受持。修行法用，汝今復聽。」佛告阿難：「若有眾生臨當形戮、杻械枷鎖、疾病困苦、鬼魅所著者，一心敬禮地藏菩薩稱名，至心誦持此呪，懺悔根本重罪，發菩提心，從今始以盡未來際，不殺、不盜、不淫、不妄語、不飲酒、不食肉、不食五辛，受三聚戒。何等為三？攝善法戒、攝眾生戒、攝律儀戒。乃至菩提，歸命三寶眾，不歸依九十六種外道邪法。」佛復告阿難：「若比丘比丘尼優婆塞優婆夷受持此呪，淨持房舍安建道場，懸繒幡蓋，香泥塗地，燒香散華，稱地藏菩薩至心敬禮，誦念此呪，五逆十惡四重八禁若不除滅，無有是處。除不至心等，方經偷僧祇物乃至一比丘物，此經不攝。若有受持讀誦此經陀羅尼呪，有飛尸伏注、鳥鳴百怪、一切諸惡，悉皆消滅。」

爾時毘沙門天王頂禮佛足白佛言：「世尊！若有受持讀誦此經陀羅尼呪者，我當擁護蓋其勢力。若有眾生信邪倒見，或事北神、九子母神、阿魔神、竈君社地社神、詐稱先人，如是邪見，我使此人行住不安、惡夢縱橫。唯願世尊聽我受持。」佛告：「善哉善哉！汝大慈無量，饒益眾生。我助汝喜。」佛說經已，梵天、帝釋、四天王、菩薩摩訶薩、一切大集、阿難等，聞佛所說，歡喜奉行。

地藏菩薩陀羅尼經

[CBETA 贊助資訊](https://www.cbeta.org/donation/index.php)

[.\(https://www.cbeta.org/donation/index.php\)](https://www.cbeta.org/donation/index.php)

CBETA 成立於 1998 年，於 2023 年 8 月 7 日轉型成為基金會。成立多年來，一部部佛典在嚴謹控管中轉換為數位典藏，不只數量龐大，而且文字校訂精確可信，又加新式標點方便閱讀。「CBETA 電子佛典集成」不僅獲得國際學界的重視及肯定，也成為大眾廣為運用的公共資源，如此成果都是在廣大信眾及有識之士的支持下才得以實現。

對一個從事佛法志業的非營利團隊，能夠長期埋首理想、踏實耕耘是非常不容易的。如今，CBETA 運作經費日漸拮据，但「佛典集成」仍有許多未竟之功。因此，懇請大家慷慨解囊、熱情贊助，讓未來有更多更好的電子佛典。

您的捐款本會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與 netiCRM 及 NewbPay 藍新金流合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

不管您持有的是國內或國外卡，所有捐款最終將以新台幣結算，所以我們所開立的捐款收據也將以新台幣計。

線上刷卡支持定期定額與單筆捐款。(銀聯卡不支援定期定額)

[前往捐款](#)

劃撥捐款

郵政劃撥帳號：5 0 4 6 8 2 8 5

戶名：財團法人佛教電子佛典基金會

欲指定特殊用途者，請特別註明，我們會專款專用。

線上信用卡 / PayPal 捐款

PayPal 是一個跨國線上付款機制的公司，CBETA 引用其服務，提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜，由於付款幣別為美元，我們除了會依您所贊助之美元金額開立收據外，另我們會依捐款當日公告匯率開立台幣收據，此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人佛教電子佛典基金會」。

For donations by check, please write the check to
"Comprehensive Buddhist Electronic Text Archive
Foundation".
